

**PEMBERITAHU PERTANYAAN DEWAN RAKYAT**

**PERTANYAAN :** LISAN

**DARIPADA :** Y.B. TUAN V. SIVAKUMAR [ BATU GAJAH ]

**TARIKH :** 9.6.2015

**SOALAN :**

**Tuan V. Sivakumar [ Batu Gajah ]** minta **MENTERI PENDIDIKAN** menyatakan keberkesanan Pendidikan Khas di negara kita berbanding dengan negara-negara yang maju. Adakah Kerajaan bercadang untuk menggunakan pendekatan pengajaran secara inklusif bagi anak-anak yang mengikuti Pendidikan Khas ini.

**JAWAPAN**

Tuan Yang di-Pertua,

Kementerian Pendidikan Malaysia (KPM) sentiasa berusaha untuk meningkatkan akses pendidikan bagi golongan orang kurang upaya (OKU) dengan menyediakan peluang pendidikan di Sekolah Pendidikan Khas, Program Pendidikan Khas Integrasi dan Program Pendidikan Inklusif. Pelaksanaan pendidikan khas di Malaysia adalah sama seperti yang dilaksanakan di negara-negara maju tetapi disesuaikan dengan sistem pentadbiran di Malaysia.

Melalui Pelan Pembangunan Pendidikan Malaysia (PPPM) 2013-1025, KPM merancang sistem pendidikan khas yang berfokuskan kepada Pendidikan Inklusif. Dalam Gelombang 1 (2013-2015), Garis Panduan

Pendidikan Inklusif dihasilkan bagi tujuan untuk menyelaras pelaksanaan Program Pendidikan Inklusif di seluruh negara. Beberapa siri latihan dan pendedahan terhadap Program Inklusif kepada pentadbir sekolah dan guru arus perdana juga dilaksanakan. KPM juga bekerjasama dengan Universiti Sains Malaysia yang sedang membuat kajian bagi mendapatkan model terbaik dalam melaksanakan Program Inklusif secara holistik agar sesuai diguna pakai di sekolah-sekolah di Malaysia.

KPM juga berhasrat untuk menyediakan kemudahan mesra OKU tandas OKU, *ramp* (susur landai), *handrail* (susur tangan) dan parkir OKU di sekurang-kurangnya sebuah sekolah rendah dan sebuah sekolah menengah sedia ada di setiap daerah bagi membolehkan Pendidikan Inklusif dilaksanakan. Bermula pada tahun 2012, sebanyak 72 buah sekolah rendah dan 74 buah sekolah menengah telah dilengkapi dengan empat kemudahan asas mesra OKU. Sehingga Januari 2015 terdapat 166 buah sekolah mempunyai kemudahan mesra OKU.

Selain daripada itu KPM juga telah melaksanakan program bersepadu meningkatkan kesedaran masyarakat tentang murid berkeperluan khas dengan mengedarkan poster, *phamplet*, *sticker* dan penanda buku.